

# Pulangkan semula ikan arowana kepada pemilik

HM 31/05/24 M/S 9

**Johor Bahru:** Penduduk sekitar Layang dan Simpang Renggam yang menangkap ribuan ikan spesies arowana yang hanyut dari sebuah kolam pecah perlu memulangkannya semula.

Pengerusi Jawatankuasa Hal Ehwal Agama Islam Johor Mohd Fared Mohd Khaled berkata, ikan ditemukan itu jelas milik individu dan sepatutnya dipulangkan kepada pemilik asal.

“Jika jelas ia milik orang dan kita tahu siapa pemiliknya, hendak kita pulangkan kepada pemilik.

“Itu sebaik-baik akhlak sebagai seorang Muslim khususnya, malah semua ajaran agama mendidik kita agar tidak mengambil hak orang lain.

“Ia berikutan kita tidak boleh makan atau mengambil sesuatu yang bukan

hak kita bahkan kita bimbang ia menjadi darah daging kita, jika ia dari sumber yang tidak sah.

“Melainkan pemilik ikan memberi izin atau menghalalkannya, maka itu rezeki kepada sesiapa yang menjumpainya,” katanya ketika dihubungi.

Kelmarin media melaporkan ribuan ikan spesies arowana ditemukan dalam kawasan anak sungai dan parit sekitar kawasan Layang dan Simpang Renggam sejak Selasa lalu.

Ikan hiasan bersisik emas dan putih dalam anggaran berat dua kilogram dipercayai dihanyutkan dari kawasan kolam ternakan kawasan berdekatan.

Justeru, penduduk sekitar tidak melepaskan peluang untuk menangkap ikan terbabit menggunakan jala dan jaring.